



U ekskluzivnom intervjuu za 4D portal, Boris Potapov, 4D portalov kolumnist i vlasnik legendarnog web portala Galaksija, otkriva što je rekao u cenzuriranom intervjuu za jedan BIH medij, te brojne druge stvari... Razgovor u nastavku!

Za početak, pozdrav od redakcije 4dportala...

4D: Na koje sve načine istražujete objektivnu stvarnost, osim preko web stranice Galaksija?

BP: Vebsajt uglavnom koristim za objavljivanje članaka koji ukazuju na neke aspekte ove realnosti koje obično nismo u stanju percipirati dok na forumu vebsajta ljudi koji se takođe bave tom tematikom imaju priliku da razmjenjuju svoja iskustva i saznanja.

Što se samog istraživanja realnosti tiče, tu se čovjek prvo mora osloboditi svih svojih dotadašnjih predrasuda, prije nego što uopšte krene tim putem. Te njegove predrasude obično nisu toliko njegove koliko se to njemu čini. Mi smo rođeni i živimo u jednoj kontrolisanoj životnoj sredini u kojoj vlada jedna akutna nestašica bitnih i istinitih informacija dok nam se istovremeno serviraju dezinformacije koje obično prihvatamo kao istinu. Tako, uz pomoć kontrole istinskih informacija i distribucije dezinformacija, kontrolisana je i naša svijest, pa tako i naša percepcija, razmišljanje i ponašanje. Dobra analogija za predstavljanje te problematike bio bi onaj podrum iz Kusturicinog filma Podzemlje. Mi smo rođeni u tom podrumu i živimo u njemu nesvjesni drugih realnosti dok nas drug Marko kontroliše odozgo uglavnom uz pomoć kontrole informacija. Tako je većina podrumaša manje više razvedena od objektivne realnosti i svako "halucinira" na svoj način. U međuvremenu, u podrumu je stvorena i jedna tzv. 'koncenzus realnost' koja podrazumijeva onu iluziju koju međusobno dijeli najveći broj podrumaša i ona se ujedno uzima kao "istinska realnost". Oni koji ne dijele s njima tu njihovu realnost, smatraju se nenormalnim. Doduše, ova problematika je odavno poznata u gnostici, pa nas ne bi trebalo čuditi zašto je poznati ruski ezoteričar Gurđijev još davno tvrdio da – većina ljudi cijeli svoj život provede u jednom snu i da se neki u tom svom snu bave i naukom, dok drugi čak pišu i knjige.

Na primjer, nedavno je izveden jedan interesantan eksperiment gdje su priključili kompjuter bez antivirusnog programa i tzv. 'firewall-a' na internet. Trebalo je samo deset minuta da taj kompjuter bude zaražen od strane kojekakvih trojanskih konja, virusa itd. koji su preuzeli kontrolu nad njim. Tako, on više nije bio on. Slično tome i mi se rađamo na ovom svijetu bez ikakvih zaštitnih sistema i brzo bivamo inficirani raznim programima koji tu vladaju. Onda nam ti programi počinju da regulišu percepciju, razmišljanje i ponašanje, tako da nije nikakvo čudo što se često ponašamo kao muve bez glave i što se od većine onoga što mi smatramo racionalnim diže kosa na glavi svakom malo svjesnijem biću.

Srećom, za razliku od kompjutera, pored uveliko programiranih ličnosti koje su kao takve vještačkog karaktera, mi kao ljudska bića imamo i neke komponente koje su prirodne i koje mogu biti od velike pomoći, mada ih većina nas nije svjesna. Tako, kada čovjek krene u istraživanje realnosti, on istovremeno mora da sprovodi i dekontaminaciju svoje ličnosti. Što mu to bolje polazi za rukom, utoliko mu se više bistre percepcija i razum, te je u stanju da vidi i razumije više nego što je to mogao prije. I na kraju, što nam više uspije da vidimo realnost objektivno, utoliko ćemo više biti u stanju da optimiziramo i našu interakciju s njom.

4D: Vi ste rođeni u Bosni i Hercegovini i odrasli ste tamo?

BP: U stvari, imao sam sreću da sam bio rođen u Bosni kao u jednoj "mješovitoj" sredini za vrijeme Jugoslavije kada su religijski i nacionalni programi bili uveliko potisnuti od strane tadašnjeg vladajućeg režima i ideologije. Sjećam se da sam tada kao dijete bio prilično zbunjen kad sam prvi put čuo od odraslih da nismo svi isti i da se pripadnici drugih nacionalnih i religijskih grupa mogu uglavnom prepoznati i po imenima a meni se sve do tada činilo da jesmo isti jer sam svakodnevno dosta vremena provodio na ulici družeći se s drugom djecom. Nisam bio u staju da primjetim ikakvu razliku među nama jer je u suštini prirodne razlike nije ni bilo. I sjećam se kako sam još imao jedan jak osjećaj da tu nešto ne može biti u redu a sada mi je potpuno jasno da sam tada bio u pravu jer smo kao ljudska bića vještački podijeljeni na raznorazne grupe prema principima koji nemaju veze ni sa razumom, ni sa prirodom. Tako je onima koji su nas podijelili prilično lako da nahuškaju jednu grupu ljudskih bića na drugu kad god im se to prohtije ili se ukaže potreba.

4D: Već u Sarajevu ste primjetili masovne manipulacije ljudima, da li je to prevagnulo da se zainteresirate za teorije zavjere, ili ste se više inspirirali globalnim događajima?

BP: Naravno, moram priznati da sam u vremenima neposredno pred izbijanje sukoba na Balkanu spavao dubokim snom kao i većina drugih a ono što sam sanjao, smatrao sam svojom percepcijom, odnosno, realnošću. Događaje koji su prethodili izbijanju rata tumačio sam na principu "što je babi milo, to joj se i snilo", čvrsto se oslanjajući na ono - "ljudi sigurno nisu toliko ludi da zarate". Tako, sam dočekao rat radeći u Hrvatskoj kao veterinar neposredno nakon završetka fakulteta u Sarajevu. Tih godina me je taman nekako krenulo, pa jednostavno nisam htjeo da vidim ništa što bi moglo narušiti temelje iluzije u kojoj sam živjeo. Tako sam sve one znakove koji su ukazivali na približavanje katastrofe, farbao u ružičasto. Susret sa objektivnom realnošću doživjeo sam tek kada su minobacačke granate počele padati oko mene i ljudi počeli ginuti. Srećom, nekako uspio da se izvučem iz ratom zahvaćenih područja i vratim u Sarajevo gdje sam ubrzo primjetio znakove slične onima u Hrvatskoj neposredno pred izbijanje oružanih sukoba. Naravno, ovaj put nisam više bio optimista, pa sam napustio Bosnu ne znajući ni kuda idem. Tako sam se našao u Austriji a onda nakon par godina završio u Australiji.

Ta emocionalna trauma koju sam doživjeo nekako je poslužila kao podsticaj za moje istraživanje realnosti jer je za mene bilo očigledno to da nisam vidjeo a još manje razumijevao ono što se moglo i moralo vidjeti i razumjeti. Mislim da rat možemo definisati kao jednu psihopatološku aktivnost ljudskih bića. U ratu nema ničega viteškog ili plemenitog. To su samo priče za djecu. Tako se samo po sebi postavljalo i pitanje, kako je to moguće izmanipulisati normalne ljude da se upuštaju u takve aktivnosti? Kako je to moguće "psihopatizirati" ljude u

takvom jednom stepenu da se okrenu jedni protiv drugih?

Što se samih teorija zavjere tiče, bilo bi lijepo kad bi to stvarno bile samo teorije. Što Credo Mutwa, šaman južnoafričkog plemena Zulu reče, - "Ljudi ne ginu od teorija ali ginu uslijed zavjera". A činjenica jeste da ljudi neprestano ginu. Na primjer, ukoliko čovjek dovede u pitanje zvaničnu istinu o pozadini napada na Svjetski trgovinski centar, njega će većina normalnih ljudi automatski svrstati u kategoriju teoretičara zavjere. Međutim, ukoliko upitamo normalne ljude koliko zgrada je potpuno srušeno prilikom tog napada, većina njih će nam odgovoriti da su srušene dvije zgrade, dakle oni neboderi blizanci jer im je to tako rečeno preko TV. Međutim, u realnosti su potpuno srušene tri zgrade, STC 1, 2 i 7. Treća zgrada je bila visoka 47 spratova i u neposrednoj blizini a srušila se istog dana kao i prve dvije, brzinom slobodnog pada kao kod svake kontrolisane demolicije a u nju nije udario nikakav avion. Navodno, izbio je požar u nekoj od kancelarija na gornjim spratovima, pa je došlo do "termalne ekspanzije"! Zar nije interesantno to da su ona dva čuvena sarajevska nebodera Momo i Uzeir, gorila par dana u ovom prošlom ratu, pa se nisu srušila i dan danas su upotrebi, dok se oni američki neboderi kod izbijanja požara ruše ko kule od karata?! Nadalje, prilikom pada aviona ostaju i olupine, međutim, u slučaju udara trećeg aviona u Pentagon, i pada četvrtog otegotog aviona u mjestu Shanksville u Pensilvaniji, ti avioni kao da su se isparili u zrak!? Doduše, u zgradi Pentagona jeste pronađen jedan avionski motor ali to nije bio motor Boinga 757, nego jedan od motora koji se obično koriste za pogon bespilotnih letjelica tipa Global Hawk. Kad uzmemo u obzir i masu drugih neodgovorenih pitanja u vezi s tim događajem, mislim da se mainstream mediji, odnosno oni koji njima upravljaju kao i političari koji podržavaju ovu teoriju, mogu slobodno smatrati saučesnicima u ovom zločinu protiv čovječnosti i čovječanstva uopšte. Svojim zataškavanjem prave pozadine događaja, pa tako i istinskih vinovnika, oni su direktno odgovorni ne samo za stradanje onih ljudskih bića koja su se zadesila u avionima i srušenim zgradama, nego i stotina hiljada drugih koji su izginuli i koji će izginuti u ovom tzv. "ratu protiv terorizma". Kad ovome dodamo i druge napade kao što su oni u Španiji, Londonu itd., mislim da onda slobodno možemo reći da ovdje imamo posla sa državno sponzoriranim terorizmom ili bolje rečeno, terorizmom režiranim od strane tzv. sila novog svjetskog poretka s ciljem sputavanja ljudskih sloboda i potpunog preuzimanja kontrole nad čovječanstvom. Ukratko, ovdje imamo slučaj gdje nam isti oni koji nas napadaju, nude sigurnost u zamjenu za našu slobodu.

I na kraju, sve što se događalo i događa na Balkanu samo je jedna mikrokosmička refleksija globalnih ili makrokosmičkih događanja na nivou planete a opet ono što nam se dešava na ovoj planeti, mikrokosmički je odraz zbivanja u univerzumu. Uostalom, i ona stara hermetička maksima kaže – "kako dole tako i gore". Sve je povezano u jednu cjelinu, mada se to na prvi pogled ne vidi.

4D: Kako dolazite do svih podataka koji se mogu pročitati na vašem webu?

BP: Uglavnom uz pomoć vlastitog istraživanja i saradnje s ljudima koji se takođe bave tom problematikom. Postoji i dosta dobrih knjiga koje se normalno ne mogu naći u knjižarama i koje nikada ne postaju bestseleri upravo zato što sadrže nešto više istinitih i bitnih informacija. Informacije na koje nailazim i za koje smatram da bi bile bitne ukoliko bi bile istinite, pokušavam što bolje da ispitam, što nije nimalo lako jer je količina dezinformacija koja nam se plasira nevjerojatna.

4D: Kako se financirate?

BP: Živim kao i većina drugih ljudi od plate koju zaradim na redovnom poslu. Od toga mi je bar do sada ostajalo i dovoljno novca za održavanje vebsajta i nabavku literature koja me interesuje. U svakom slučaju, na osnovu članaka koje sam pisao za moj vebsajt i neke druge, kao i za neke magazine, nisam još ni dinara zaradio.

4D: Kakvo je vaše viđenje pozadine ratova u bivšoj Jugoslaviji, računajući i trenutno stanje u BiH?

BP: Jugoslavija je bila jaka, nezavisna i bogata zemlja sa prilično visokim životnim standardom i velikim potencijalima. Naravno, ona kao takva nije odgovala tzv. silama novog svjetskog poretka koje žele centralizovati svoju vlast i staviti sve i svakoga pod svoju kontrolu. Tako su i pod plaštom uvođenja demokratije potpomagali dolazak mediokriteta i individua psihopatološkog mentalnog profila na čelo nacionalnih stranaka, koje su odradile glavni posao u rasturanju te države iznutra dok su ih ovi podržavali izvana.

Naravno, nakon prolivene krvi, razaranja, patnje i stradanja, kod naroda je kako je i očekivano, ostala samo mržnja prema onim drugima, dok je malo ko u stanju da shvati da su svi bili podjednako izmanipulisani i kao takvi uvučeni u krvoproliće. Nakon cijepanja Jugoslavije na "buranija-državice", treća strana je lako uspostavila kontrolu nad tim područjima i izvukla korist preuzimanjem vlasništva nad prirodnim bogatstvima zemlje i profitabilnim dijelom industrije, dok je narod pretvoren u jeftinu radnu snagu, gdje čovjek još treba biti sretan ako mu uopšte i daju neki posao. Istovremeno, treća strana se trudi da tim novonastalim zemljama vladaju oni koji su poslušni a ne oni koji su sposobni i kojima je dobrostanje naroda na prvom mjestu.

4D: Na vašoj stranici postoje i neki članci koji ukazuju na destruktivnu ulogu psihopata u ljudskom društvu. Možete li reći nešto više o tome?

BP: To je fenomen koji se dešava na nivou cijele planete, pa tako i kod nas na Balkanu. U stvari, uloga individua s psihopatološkim mentalnim profilom u manipulaciji čovječanstva je jedna od tema koja se već odavno zataškava dok su nas kao ljudska bića, aktivnosti takvih individua sa pozicija vlasti koštale na stotine miliona ljudskih života. O ljudskoj patnji, stradanjima i razaranjima da ne pričamo. Čak su i naziv psihopatija promijenili u – sociopatija, kako bi se ostavio utisak da se tu radi o ljudima koji se teško uklapaju u društvo dok je stvar potpuno suprotna. Oni ne samo da se lako uklapaju u društvo, nego ga i manipulišu. Istovremeno, normalnim ljudima se predstavlja slika kako su psihopate nasilnici, kriminalci i ubice koji ako se već ne nalaze u zatvoru ili ludnici, onda će se naći tamo čim budu uhvaćeni. Činjenica jeste da njih ima u zatvorima, međutim, tu se radi samo o neuspješnim slučajevima. Čini se da ih se mnogo više nalazi u hijerarhijama vlasti, religija, multinacionalnih korporacija itd. tako da nije rijedak slučaj da se nađu i među onima koji pišu zakone, pa čak i među psihijatrima.

U suštini, tu se radi o ljudima s jednim uglavnom nasljednim psihičkim poremećajem koji čine relativno mali procenat čovječanstva, možda do nekih 6%, a glavna karakteristika im je nedostatak savjesti i dubljih ljudskih osjećanja dok istovremeno imaju jak nagon za nametanjem

svojih deluzija drugima kako bi ih kontrolisali. Taj nagon za sticanjem moći, bogatstva pa tako i kontrole nad drugima je ujedno i njihova glavna pokretačka snaga a s obzirom da nemaju savjesti, tako nemaju ni kočnica prilikom svog napretka u hijerarhijama društva. Njih broj ljudskih žrtava ne interesuje kad je ostvarivanje njihovih ideala, ciljeva, vizija ili deluzija u pitanju. Kad zauzmu upravne pozicije, onda procesom negativne selekcije odabiraju slične devijante koji su im lojalni, okružuju se njima i tako obrazuju tzv. patokratiju. Mislim da bi se čak moglo reći da oni danas upravljaju ovim svijetom i da smo mi njihovi taoci. S obzirom da drže kontrolu nad glavnim medijima, psihopatloški sadržaji koje nam kontrolisano doziraju preko njih, mijenjaju stanje naše svijesti, pa tako vremenom na psihopatološke aktivnosti počinjemo gledati kao na nešto sasvim normalno. Na primjer, mi smo danas u stanju da sasvim lijepo racionalizujemo masovna ubistva, zločine i razaranja ako te aktivnosti političari ili mediji nazovu "bitka protiv terorizma", "bitka za demokratiju", "humanitarna vojna intevencija", "kolateralna šteta" itd. U ovoj realnosti uvedena je jedna posebna terminologija s ciljem racionalizovanja psiho-patoloških aktivnosti i sadržaja. To je nešto slično onom dvostrukom govoru kojeg je George Orwell davno opisao u knjizi "1984". Istovremeno, na taj način iste sile sprovode i jedan opsežan projekat dehumanizacije i zombifikacije čovječanstva. Problem je u tome, što većinu negativnih osobina koje imaju psihopate, imaju i normalni ljudi ali te osobine kod normalnih ljudi nisu toliko izražene, odnosno, potiskivane su od strane čovjekove savjesti i duha, međutim, kad se čovjek nađe izložen psihopatloškim sadržajima, one negativne osobine kod njega se potenciraju i inteziviraju, te se on tako postepeno transpersonalizirira ili – "psihopatizira".

Nadalje, psihopate se međusobno lako prepoznaju i imaju tendenciju da obrazuju kojekakva tajna ili polutajna društva, koja imaju veliki uticaj na stvaranje sistema života na ovoj planeti. S obzirom na predatorsku suštinu tih individua, obrazuje se sistem na osnovu piramide gdje oni odozdo služe kao izvor energije onima odozgo. Odatle, nije nikakvo čudo zašto onaj simbol piramide sa svevidećim okom vidamo svuda, na novčanicama američkog dolara, amblemima multinacionalnih korporacija itd.

Simboli i rituali inače igraju veliku ulogu u friziranju podsvijesti čovječanstva, tako da je i to jedna posebna tema koju ovom prilikom ne možemo razmatrati. Uostalom, ponešto na tu temu se već može naći na mom vebsajtu.

Što se samog fenomena manipulacije ljudi od strane psihopatije i patokratije tiče, to je još davno prilično lijepo opisala grupa poljskih psihologa na čelu sa Andrejom Lobačevskim u knjizi Politička ponerologija, čiji se besplatan prijevod može naći na internetu uz pomoć Google pretraživača. Postoje i druge dobre knjige na tu temu kao što su Bez Savijesti i Zmije u odijelima, kanadskog psihologa Roberta Hare-a, Maska trezvenosti od Cleckleya, Susjed sociopat, Marte Stouth itd.

4D: Kako gledate na ovo trovanje naše životne sredine?

BP: Iste sile protiv nas cijelo vrijeme vode jedan kemijsko-biološki rat u kome nas bombarduju cijelom jednom paletom toksičnih kemikalija preko hrane, vode i vazduha koje štetno utiču na našu svijest i fiziologiju. Tako, na primjer, fluor trpaju u zubne paste i vodu, pod izgovorom da je koristan za zdravlje naših zuba dok on u suštini nema toliko veze s tim koliko s kontrolom našeg uma. Genetički modifikovana hrana ujedno modifikuje i našu DNK a tu su i stotine raznih aditiva

u hrani kao što je aspartam, vještački šećer, koji kobajagi pomaže kod mršavljenja dok istovremeno stvara kaos u našem nervnom sistemu. Iz vazduha nas praše kemijskim koktelima ili tzv. "kemtrejlisma" koji na prvi pogled izgledaju kao normalni tragovi mlaznih aviona. Nedavno smo imali priliku vidjeti i to kako su pokušali sprovesti masovni tretman ljudske populacije toksičnim vakcinama na osnovu izmišljene pandemije svinjske gripe. Čini se da je u sprječavanju tog projekta internet odigrao presudnu ulogu?! Da ne pominjemo rasturanje radioaktivnih materija uz pomoć atomskih proba, radioaktivne municije, nuklearnog otpada itd. Poznato je to da postoji direktna veza između radioaktivnosti i oboljevanja od raka, međutim, iste sile će nas uvjeravati da je za ogroman porast oboljenja od raka poslednjih godina najviše kriv duvan a onda će se svesrdno truditi da nam demonstriraju njihovu brigu za naše zdravlje tako što će nam zabranjivati pušenje. Da ne nabrajam više jer se na internetu može naći dosta podataka u vezi s ovim.

U suštini, u ovoj realnosti se odvija jedna velika bitka, bitka za našu dušu dok većina nas te bitke nije ni svjesna, pa mnogi od nas vjerovatno neće biti svjesni ni kad ostanu bez nje.

4D: Da li ste u kontaktu s ljudima kao što su David Icke ili Alex Jones i drugima koji se na sličan način bave stvarnošću i što mislite o njihovom radu?

BP: Prije nekih desetak godina prisustvovao sam jednom Davidovom predavanju kad je gostovao u Australiji i pročitao sam većinu njegovih knjiga. Cijenim trud kojeg je uložio u predstavljanje nekih aspekata manipulacije čovječanstva. Takođe pratim i Aleksa Jonesa, mada smatram da se bitka protiv sila novog svjetskog poretka ne može voditi sa hrišćanske platforme odakle je on vodi jer su iste sile koje odvajkada kontrolišu čovječanstvo i pokušavaju ga potpuno porobiti, napravile i tu platformu na koju se on čvrsto oslanja. Čini mi se da takvi ljudi pretvaraju ovu tematiku u neku vrstu biznisa i da nije slučajno to zašto previđaju neke aspekte manipulacije čovječanstva koji su veoma bitni.

Na primjer, uloga psihopata u manipulaciji i stradanju čovječanstva kroz istoriju je jedan veoma bitan aspekt ove problematike koji se može lako primjetiti ako se stvar malo bolje prouči. To je takođe nešto protiv čega bi svjesni ljudi mogli i poduzeti nešto konkretno s ciljem ublažavanja patnje i stradanja čovječanstva na ovoj planeti.

Danas imamo mnogo kojekakvih boraca za istinu i "duhovnjaka" koji su od sve ovoga napravili samo jedan biznis i koji u suštini odvlače ljude u pogrešnom pravcu.

Međutim, postoji i dosta drugih istraživača koji nisu toliko poznati kao David Icke ili Alex Jones a pružili su ogroman doprinos rasvjetljavanju tamnih zona ove realnosti. Na primjer, jedan od prvih koji je ukazivao na to da u svemu ovome postoji još jedna strana i koji je pokušao ukazati na njenu ulogu u manipulaciji čovječanstva, bio je William Bramley. U knjizi Bogovi iz raja on je jasno naveo podatak da je prilikom istraživanja pozadine svakog međuljudskog sukoba nailazio na NLO-e i vanzemaljce, šta god ili koga god oni podrazumijevali i ukazivao je na to da nas te sile vijekovima manipulišu na temelju makijavelističkih principa iz jedne druge oblasti postojanja koja je izvan naše percepcije. Iste sile nekada davno su bile smatrane i bogovima a one su ujedno i izvor naših svetih knjiga i religija. Te različite religije nisu im samo samo služile za podjelu čovječanstva na "različite" grupe, nego su i kao mentalni programi zatvarale čovjekovu

svijest i percepciju; modifikovale su čovjekov način razmišljanja i tako ga pretvarale u roba tih sila. Oni koji vjeruju u kojekve spasitelje izvana, neće nikada otkriti onog istinskog spasitelja koji se nalazi u njima samima. Tako i dan danas, većina nas svoja vjerovanja miješa sa znanjem dok smo samim vjerovanjem u kojekakve vanjske autoritete svoju ličnu moć predali u tuđe ruke i stavili se na njihovu milost i nemilost. Onda, kao takvi još i kukamo kad nam nije lijepo, kao da oni koji žive kao miševi, mogu očekivati nešto bolje od sudbine miševa?!

Ukratko rečeno, postoji mnogo podataka i izvora koji ukazuju na to da se kao čovječanstvo ne nalazimo na vrhu lanca ishrane, odnosno, da emocionalna energija koju emitujemo u stanjima straha i patnje, nekima služi kao hrana. Naravno, sa gledišta entiteta koji se hrane našom energijom, sam sistem života na ovoj planeti mora biti tako ustrojen da čovjek stalno živi ispod praga svjesnosti i u uslovima u kojima će obezbjeđivati tu energiju svojim bogovima-nadzornicima, bio on njih svjestan ili ne.

Mislim da postoji dosta činjenica koje ukazuju na to da je je naš prostor-vrijeme, kojeg smo normalno svjesni, upleten u jednoj višoj dimenziji koja je takođe stvarna i da naša oblast postojanja veoma lako može da predstavlja jedno bojno polje za stanovnike tog hiperdimenzionalnog prostora-vremena kojeg su neki u našoj prošlosti nazivali i - oblastima bogova. Tu bi se, naravno, radilo o postojbini stvarnih kontrolora ovog svijeta. Postoji i mogućnost da mi igramo ulogu pijuna u igrama tih "bogova" i da naše aktivnosti mogu da predstavljaju poteze i manevre pomenutih entiteta koji nastanjuju taj hiperdimenzionalni prostor. Njima je stalo da ne budemo svjesni njihovog postojanja zbog toga što bi sigurno, ukoliko bi stvarno otkrili činjenice koje ukazuju na njihovo prisustvo i ove njihove igre, jednostavno prestali da igramo u njima. Neki od istraživača kao što je npr. Barbara Bartholic, idu toliko daleko da tvrde da iste sile stoje iza "majki Tereza" kao i iza serijskih ubica.

Dakle, to bi bilo nešto kao da živimo na trećem spratu jedne velike zgrade, da se ne nalazimo se na vrhu lanca ishrane i da nama vijekovima manipušu entiteti koji stanuju na spratu iznad našeg. Doduše, ta teorija da je naš svijet obavijen jednim širim svijetom, čije funkcionisanje se nalazi izvan naših čula i nivoa svijesti, nije uopšte nova. Tako, kad se ponekad sretnemo s tim mehanizmima njihove manifestacije ili djelovanja - mi njih tretiramo kao paranormalne.

4D: Kakav bi onda bio glavni mehanizam njihovog upravljanja događajima u našoj stvarnosti i nad čovječanstvom?

BP: Kao 'vozila' za svoju interakciju sa čovječanstvom, obično odabiru – psihopate. Individue takvog mentalnog sklopa su im najpogodnije za izvođače radova jer one jednostavno nemaju savjesti a istovremeno imaju jak nagon za sticanjem lične moći i vlasti nad drugim ljudima. Tako ih oni, da tako kažem, preuzimaju kao 'avatare' ili ih navode slično kao uz pomoć daljinskog upravljača, instalirajući im kojekakve vizije, ideje, ideale i uvide ili im se jednostavno predstave kao Bog lično, čije želje oni treba da ispunjavaju, za šta će naravno biti dobro nagrađeni. S obzirom da psihopate čvrsto vjeruju u deluzije koje smatraju svojim, te odišu samopouzdanjem to im daje i jedan oreol karizmatičnosti uz pomoć čega su u stanju da prilično lako izmanipulišu normalne ljude. Mislim da nije slučajno to što mnogi psiholozi i psihijatri tvrde da se u susretu s psihopatom normalan čovjek ponaša kao srna u noći uhvaćena u snopu automobilskih svjetala. Tako on biva pregažen ne znajući ni šta mu se desilo. S tim u vezi, jedino znanje o tom fenomenu čovjeka može spasiti.

4D: Neki psiholozi nazivaju psihopate i “daltonistima za ljudska osjećanja”?

BP: Da, upravo tako; i nije li fenomen to što mi branimo daltonistima da upravljaju sredstvima javnog saobraćaja zbog toga što nisu u stanju da razaznaju boje, pa tako mogu ugroziti i putnike dok istovremeno dozvoljavamo ovim “daltonistima za ljudska osjećanja” da upravljaju čak i državama?!

4D: Sve češće se govori o 'trećem svjetskom ratu', mislite li da se to pokušava izazvati trenutnim krizama, okupacijama, bombardiranjima i revolucijama širom Bliskog Istoka?

BP: Ne bi me čudilo ukoliko bi došlo i do toga jer se neka vrsta haosa mora izazvati kao preduslov za uvođenje tzv. Novog svjetskog poretka, odnosno, satjerivanje ovaca u zajednički tor i preuzimanja potpune kontrole nad njima!? Ljudi su već oguglali na terorističke akte, tako da iduća predstava mora podrazumijevati nešto mnogo žešće. Uostalom, propagandna mašinerija je već u podsvijesti ljudi iz tzv. razvijenog svijeta izjednačila Muslimane s teroristima, tako da su time pripremili teren za nuklearni napad na neke islamske zemlje a da pritom ne naiđu na neki značajan otpor od strane javnog mnjenja. I naravno, njima nije nikakav problem režirati neki incident koji će im onda poslužiti kao opravdanje za rat.

4D: Da li ste od rata do danas dolazili u Sarajevo?

BP: Da, bio sam u Sarajevu već nekoliko puta u posjeti rodbini, prijateljima kao i mojim omiljenim ćevabdžinicama i burekdžinicama. Naravno, kad sam tamo ne zaobiđem ni Sarajevsku pivaru. Većina mojih prijatelja koje sam stekao za vrijeme gimnazijskih i studentskih dana razišla se po cijelom svijetu, međutim, ipak je ostalo i dosta njih s kojima sam još uvijek u kontaktu.

4D: Što mislite o WikiLeaksu, Julianu Assangeu i pratećim događajima?

BP: Mislim da se tu radi samo o jednoj predstavi s ciljem distrakcije, odnosno, kontrolisanom ispuštanju informacija koje po svojoj suštini nisu toliko bitne i koje nam ne otkrivaju ništa mnogo novog. Kad tzv. “mainstream” mediji pridaju nekome toliku pažnju, onda je tu nešto automatski sumnjivo jer postoje ljudi koji su objavljivali daleko bitnije informacije a o njima preko zvaničnih medija nikada nismo čuli. A nekim slučajem, većina njih nije dugo ni opstala u ovoj realnosti. U slučaju Assangea, meni lično je bila dovoljna ona njegova izjava u smislu da ga nerviraju teorije zavjere kao što je ona u vezi sa napadom na Svjetski Trgovinski Centar i Pentagon, čime je podržao onu zvaničnu “binladensku teoriju” prema kojoj je najsofisticiraniji teroristički napad u istoriji čovječanstva organizovala neka individua iz pećine u avganistanskim brdima.

4D: Da li ste optimist ili pesimist po pitanju bliže budućnosti u svijetu, ili barem na Balkanu?

BP: I optimizam i pesimizam su podjedanko udaljeni od objektivne realnosti. Sve ono što nam se kao čovječanstvu dešava u direktnoj je vezi sa razvojnim nivoom naše svijesti.

U ovim vremenima evidentno je to da religijski i nacionalni mentalni programi još uvijek dominiraju umovima ljudi, pa je relativno malo onih koji su u stanju da se izdignu izvan svojih



religijskih i nacionalni obora i identifikuju se sa jednim humanim ljudskim bićem na nivou ove planete, te se tako i ponašaju. S druge strane, sile koje namjeravaju da nas potpuno porobe sve više i više stežu obroč oko nas.

Mislim da postoje velike šanse da u skoroj budućnosti na makrokosmičkom nivou, dakle, na nivou naše planete, budemo suočeni sa jednim scenarijem sličnim onom kojeg smo već imali priliku vidjeti u Bosni, na mikrokosmičkom nivou. A u Bosni smo imali priliku vidjeti kako su lokalni mediokriteti i psihopate uz pomoć uticaja sila izvana, zavadili različite narode koji žive na tom području i doveli do izbijanja rata. Nakon nekoliko godina ubijanja, razaranja i patnje, svaki od tih naroda vapio je za mirom i rado je prihvatio "glas razuma" koji je došao izvana, odnosno, uslove za uspostavljanje mira koje su im ponudili stranci ("vanzemaljci"). Uskoro im dolazi stranac ("vanzemaljac") kao "visoki predstavnik međunarodne zajednice" i strane oružane "mirovne" sile da upravljaju njihovom državom i da uspostave poredak kakav im odgovara? Lokalne medokritete, zaslužne za izazivanje konflikta, nagrađuju za njihove usluge, tako što im daju neke beneficije u novoj državi. Ovi donose zakone koji omogućavaju prenos prirodnih bogatstava u ruke stranaca (vanzemaljaca) i koji treba da štite njihovo poslovanje. Ubrzo nakon toga, prirodne zalihe zemlje, infrastruktura i profitabilni dio industrije prelaze u ruke stranaca (kao što je to vjerovatno bilo planirano još prije izbijanja sukoba) a lokalno stanovništvo je pretvoreno u robove, koje strane sile iskorištavaju kako hoće uz minimalnu naknadu i uz minimalan direktan nadzor.

Naravno, u svemu tome, kontrolisani mediji su odigrali jednu od najvažnijih uloga. Tako, u poslednje vrijeme možemo primjetiti kako od strane istih izvora, sve više bivamo mentalno kondicionirani u vezi s postojanjem naše "kosmičke braće". Zvanični mediji sve češće prenose vijesti o pojavi NLO-a a prije par dana i američki FBI je objavio neke dokumente koji potvrđuju da se u mjestu Roswell, 1947.-me godine ipak srušio NLO a ne meteorološki balon i da su u njemu bili pronađeni mrtvi vanzemaljci. Ovdje se moramo zapitati zašto su cijelo vrijeme to zataškavali, vršeći istovremeno ogroman pritisak na svjedoke i istraživače njihove interakcije s nama, zašto su se sve do sada ismijavali oni koji su uopšte govorili o tome a sada odjednom takve vijesti postaju normalne u medijima?! Ukoliko obratimo pažnju na filmove za djecu, primjetićemo da se i tu javlja cijeli jedan niz čudnih likova. Ništa nije slučajno. Naša djeca su posebna meta mentalnog friziranja ove vrste. Naravno, teško je sada predvidjeti kakvu će vrstu haosa prvo izazvati kako bi se ovi mogli pojaviti kao naši spasioci ili kosmička braća koja nam navodno pomaže u evoluciji?! U poslednje vrijeme, neki izvori pominju i veliku mogućnost da iste sile proglase princa William-a za našeg "mesiju" i da se završna faza tog plana treba odigrati za vrijeme Olimpijskih igara u Londonu, sljedeće godine. Mislim da se već sada može primjetiti to da se propagandna kampanja u vezi s njegovom promocijom već dobro zahuktala. U svakom slučaju, vidjećemo.

4D: I na kraju, da li postoje ikakvi znakovi buđenja kod ljudi?

BP: Naravno, postoji dosta znakova koji ukazuju na to da su ljudi počeli napokon da se sve više bude. Sasvim je moguće da će se na nivou planete odigrati jedna polarizacija, gdje će jedan dio čovječanstva tonuti sve dublje u san i takvi ljudi će pošto-poto pokušavati očuvati dosadašnju iluziju u kojoj su živjeli, dok će se drugi opet buditi, međusobno povezivati i saradivati.

Ovi drugi će ujedno predstavljati i glavnu silu koja će biti u stanju zbaciti jaram s leđa čovječanstva u kojeg smo još davno upregnuti i efikasno se suprostaviti onima koji su nas upregli. Ovaj otpor će biti zasnovan na ljudskom duhu, koji predstavlja jednu višu inteligenciju koja je u nama ili naše suštinsko biće koje je vječno i kojeg većina nas još uvijek nije svjesna. Taj naš duh raspolaže s jednim istinskim znanjem kojeg smo donjeli u ovu realnost. Mi smo se do sada uglavnom identifikovali s našim fizičkim tijelima i ličnostima koje su po svojoj suštini vještačkog i prolaznog karaktera.

Tako će i mnogi od nas uskoro spoznati da ne postoji moć i bogatstvo ovog svijeta koji su vrijedni jednog ljudskog života. Što se čovjek počne više buditi, više će biti sposoban da prepozna psihopatološke sadržaje kojima je svakodnevno izložen od strane ovog sistema i da se dekontaminira od njih. Nadalje, on će poštovati raznolikost ljudskih bića, individualnost i njihovu slobodnu volju. Ukratko rečeno, on će živjeti i ponašati se u skladu sa kreativnim silama Svega što jeste, što će mu opet obezbijediti i jednu daleko kvalitetniju realnost za njegovu dalju egzistenciju i napredak, od ove "podrumske".

Hvala na intervjuu za 4dportal...

Preneseno sa: <http://www.4dportal.com>



Ovdje može biti Vaša reklama